

ZAKON O LOVSTVU

**Na osnovu člana IV.B:7 a) (IV) Ustava Federacije Bosne i Hercegovine, donosim
UKAZ O PROGLAŠENJU ZAKONA O LOVSTVU**

Proglašava se Zakon o lovstvu koji je donio Parlament Federacije BiH na sjednici Doma naroda od 29.jula 2005.godine.

**Broj: 01-02-29/06
24.januara 2006.godine
Sarajevo**

**Presjednik
Niko Lozančić, s.r.**

Zakon o lovstvu je objavljen 01.02.2006. godine u («Službenim novinama Federacije BiH», broj: 4/06), i stupio je na snagu 09.02.2006. godine.

ZAKON O LOVSTVU

I – OSNOVNE ODREDBE

Član 1.

Ovim zakonom uređuje se organizacija lovstva i lovišta, uzgoj, zaštita, lov i korištenje divljači i njezinih dijelova, katastar lovišta, lovno-privredna osnova i planiranje, lovočuvarska služba, upravni i inspekcijski nadzor nad provođenjem ovog Zakona, kaznene odredbe i druga pitanja od značaja za oblast lovstva na teritoriji Federacije Bosne i Hercegovine (u daljem tekstu: Federacija).

Lovstvo u smislu ovog Zakona, predstavlja javnu djelatnost i obuhvata mjere zaštite i uzgoja divljači, uređenje lovišta, lovljenje divljači i racionalnu upotrebu divljači i lovišta, koji doprinosi očuvanju biološke raznolikosti ekoloških sistema i ekološke ravnoteže prirodnih staništa divljači.

Član 2.

U ovom Zakonu u upotrebi su pojmovi sa sljedećim značenjem:

Divljač, u smislu ovog zakona, su određene vrste životinja (lovna divljač) koje slobodno žive u prirodi.

Pravo lova je ovlast da se na određenoj površini zemljišta i voda provedu radnje i poduzimaju mjere uzgoja, zaštite, lova i korištenje divljači.

Korisnik zemljišta je vlasnik i korisnik zemljišta na kojem je ustanovljeno lovište.

Lovište je određena površina zemljišta koja predstavlja zaokruženu prirodnu cjelinu u kojoj postoje ekološki i drugi uslovi za uzgoj, zaštitu, lov i korištenje divljači.

Otvoreno lovište je ono u kojem je moguća nesmetana dnevna i sezonska migracija divljači.

Ograđeno lovište je ono u kojem je smanjena mogućnost (prirodno ili ograđeno preprekama) migracija divljači. Koristi se za intenzivni uzgoj, površina nemože biti manja od 600 ha.

Uzgajalište divljači nalazi se na površinama zemljišta većim od 100 ha, a manjim od 2000 ha, ograđeno je ogradom, gdje se proizvodi divljač za reprodukciju i lov.

Zverinjak je površina zemljišta do 100 ha ograđena ogradom, koju divljač ne može napustiti

Lovno-gospodarska osnova je planski akt kojom se uređuje gospodarenje divljači i lovištem za desetogodišnji period. Bez lovnog-gospodarske osnove lov divljači nije dopušten.

Program uzgoja divljači je planski i gospodarski akt kojim se detaljno uređuje uzgoj, zaštita, lov i korištenje divljači u uzgajalištima divljači.

Trofej divljači je divljač ili njezini dijelovi uređeni za duže čuvanje i ocjenjivanje.

Vrhunski trofej divljači je trofej ocjenjen većim brojem bodova tačaka od evidentiranog najjačeg trofeja pojedine vrste divljači u Federaciji.

Vrhunski trofeji krupne divljači ne smiju se iznositi iz Federacije.

Lov je skup osmišljenih aktivnosti čovjeka u svrhu odstrjela ili hvatanja životinja zakonom označenih kao divljač.

Član 3.

Divljač je državno vlasništvo i dobro od općeg interesa koje uživa posebnu brigu i zaštitu.

Ulovljena, ranjena i uginula divljač i njenmi dijelovi pripadaju korisniku lovišta, a na zemljištima i vodama izvan lovišta pripada kantonalnom ministarstvu nadležnom za poslove šumarstva (u daljem tekstu: kantonalno ministarstvo), ili pravnom ili fizičkom licu kojem je povjerena zaštita divljači izvan lovišta.

II. LOVSTVO – KORISNICI LOVIŠTA I LOVAČKA UDRUŽENJA

Član 4.

Prema namjeni lovstvo može biti gospodarsko, sportsko, gospodarsko – sportsko i sa posebnom namjenom.

Pod sgospodarskim lovstvom podrazumjeva se bavljenje lovstvom u cilju sticanja dobiti.

Pod sportskim lovstvom podrazumjeva se bavljenje lovstvom radi lične razonode i rekreacije.

Pod gospodarsko – sporskim lovstvom podrazumjeva se kombinacija gospodarskog i sportskog lovstva.

Pod lovstvom sa posebnom namjenom podrazumjeva se bavljenje lovstvom u cilju naučnih istraživanja, nastave, zaštite naročito rijetkih životinja, kao i za druge potrebe utvrđene posebnim propisima.

Član 5.

Lovljenje divljači obuhvata: traženje, dočekivanje, posmatranje, slijeđenje, odstrjel i hvatanje žive divljači, lovljenje pticama grabljivicama, skupljanje uginule divljači i njezinih dijelova.

Član 6.

Za vršenje lovstva, osnivaju se lovišta.

U lovište ne ulaze:

1. izgrađeno i neizgrađeno građevinsko zemljište;
2. javni putevi i druge javne površine uključivši i zaštitni pojas do 300 m od naselja;
3. određeni dijelovi prirode koji su proglašeni posebno zaštićenim objektima prirode po propisima o zaštiti prirode u kojima je aktom o proglašenju ili posebnim aktom zabranjen lov (nacionalni parkovi, parkovi prirode, strogi rezervati, specijalni zoološki i ornitološki rezervati i drugi posebno zaštićeni objekti prirode);
4. more i privredni ribnjaci s obalnim zemljištem koje služi za korištenje ribnjaka, a federalni ministar poljoprivrede, vodoprivrede i šumarstva (u daljem tekstu: federalni ministar) propisat će lov u ribnjacima;

5. rasadnici, voćni i lozni nasadi namijenjeni intenzivnoj proizvodnji u površini do 100 ha, ako su ograđeni ogradom koja sprječava prirodnu migraciju sve dlakave divljači;
6. druge površine na kojima je aktom o proglašenju njihove namjene zabranjen lov;
7. ograđeni prostori u kojima se umjetno uzgaja divljač.
8. privatni posjedi, ako se na njima pričinjava šteta.

Član 7.

Na površinama zemljišta i na vodama izvan lovišta divljač je dužan zaštititi vlasnik, pravno ili fizičko lice i kantonalno ministarstvo na čijem se području nalazi zemljište i vode koje se koriste.

Zabranjen je lov zaštićene divljači na zemljištima i vodama izvan lovišta.

Izuzetno od stava 1. ovog člana, u slučajevima kada se radi o površinama zemljišta većim od 100 ha pravnih ili fizičkih lica koja koriste ta zemljišta, kantonalno ministarstvo povjerit će zaštićivanje divljači na takvim površinama drugim pravnim ili fizičkim licima.

Član 8.

Lovištima se gazduje na osnovu lovno-privredne osnove.

Član 9.

Pravo lova divljači imaju građani koji ispunjavaju uslove određene ovim zakonom, propisima donesenim na osnovu ovog zakona i opštih akata pravnih lica (lovačke organizacije i dr.) koja gazduju lovištem.

Lov divljači može se vršiti samo dozvoljenim sredstvima, na propisani način i u odrijeđeno vrijeme.

Godišnji ulov zaštićene divljači može se vršiti samo u granicama godišnjeg plana gazdovanja.

Član 10.

Korisnici lovišta su pravna lica koja su na osnovu odredaba ovog Zakona dobila lovište na gazdovanje.

Korisnici lovišta, u smislu ovog Zakona mogu biti: lovačka udruženja, privredna društva šumarstva, te ostala pravna lica registrovana za bavljenje lovstvom.

Korisnici lovišta mogu se dobrovoljno povezivati u lovačke asocijacije radi unapređenja i ostvarivanja zajedničkog ili općeg interesa ili cilja u skladu sa odredbama Zakona o o udruženjima i fondacijama («Službene novine Federacije BiH», broj: 45702).

Član 11.

Lovačko udruženje formira se radi organizovanog bavljenja lovstvom, ostvarivanja opšteg interesa za unapređenje uzgoja i zaštite lovstva i iskorišćavanje divljači, zaštitu prirode i okoliša u očuvanju prirodnog staništa divljači, njegovanja lovačke etike i običaja ili druge ciljeve, kroz sportske - rekreacione i ekološke aktivnosti.

Član 12.

Lovački savezi u Federaciji su samostalne organizacije u koju su svojevrijem učlanjeni korisnici lovišta i druge organizacije i udruženja zainteresovane za razvoj lovstva i na koje se primjenjuju sve odredbe zakona koje su inače propisane za udruženja.

Lovački savez, u smislu ovog Zakona, obavlja svoju osnovnu djelatnost (za koju je registriran), te obavlja poslove koje su mu, kao javna ovlaštenja, povjereni ovim Zakonom, odnosno za koje je ovlašten, a naročito:

- unapređenja lovstva;
- pružanje stručne pomoći kod donošenja i provođenja mjera gazdovanjem lovištem i obrazovanjem lovaca;
- dosljednog provođenja zakona i drugih propisa o lovstvu i davanje prijedloga za njihovo unaprjeđenje;
- ostvarivanja jedinstvene lovne politike na cjelom prostoru Federacije i u inostranstvu;
- realizacije lovnog menadžmenta.

Korisnik lovišta je dužan:

- uraditi inventuru životinjskih vrsta i stanja lovišta;
- osiguravati finansijska sredstva za provedbu lovno-privredne osnove, za štete na divljači i lovištu i naknadu štete koju čini divljač (osiguranjem kod osiguravajućeg zavoda, pologom kod banke, hipotekom na nekretnine i sl.);
- imati stručnu službu, odnosno stručnjaka za provedbu lovnogospodarske osnove;
- imati organiziranu lovočuvarsku službu;
- imati lovačke pse odgovarajuće pasmine za lovište koje uzima u zakup koji su registrovani kod kinološkog saveza Federacije i da imaju položen radni ispit;
- imati lovačkog psa osposobljenog za praćenje krvnog traga ili krvosljednika s položenim ispitom, ako u lovištu, koje uzima u zakup ima predviđen odstrel krupne divljači.

Osim uslova iz stava 2. ovog člana, korisnik lovišta obavezno stavlja na uvid ispravu iz koje je vidljivo da je registrovan za obavljanje lova.

III – DIVLJAČ I NJENA ZAŠTITA

Član 13.

Divljač u smislu ovog zakona su slijedeće vrste životinja:

a) DLAKAVA DIVLJAČ (SISARI)

- **Glodari** (*Rodentia*): zec (*Lepus europeus*), divlji kunić (*Oryctolagus cuniculus*), bizamski pacov (*Ondatra zibethicus*), puh obični (*Glis glis*), vjeverica (*Sciurus vulgaris*);
- **Mesojedi** (*Carnivora*): divlja mačka (*Felis silvestris*), ris (*Lynx lynx*), vuk (*Canis lupus*), čagalj (*Anis aureus*), lisica (*Vulpes vulpes*), kuna zlatica (*Martes martes*), kuna bjelica (*Martes foina*), smeđi tvor (*Putorius putorius*), velika lasica – hermelin (*Mustela erminea*), lasica mala (*Mustela nivalis*), vidra (*Lutra lutra*), jazavac (*Meles meles*), mrki medvjed (*Ursus arctos*).
- **Papkari** (*Arctiodactyla*): obični jelen (*Cervus elaphus*), jelen lopatar (*Dama dama*), srna (*Capreolus capreolus*), divokoza (*Rupicapra rupicapra*), kozorog (*Capra ibex*), muflon (*Ovis musimon*), divlja svinja (*Sus scrofa*)

b) PERNATA DIVLJAČ (PTICE)

- **Koke** (*Phasianidae*): fazan (*Phasianus colchicus*), prepelica počpura (*Conturnix coturnix*), jarebica poljska-trčka (*Perdix perdix*), jarebica kamenjarka – grivna (*Alectoris graeca*), jarebica šumska – lještarka (*Terastes bonasia*), veliki tetrijeb – gluhan (*Tetrao urogallus*), mali tetrijeb-ruševac (*Lyrurus tetrix*).
- **Patke** (*Anatidae*): patka gluhara (*Anas platyrhynchos*), patka pupčanica (*Anas crecca*), patka glogoljica (*Netta rufina*), patka kreketaljka (*Anas strepera*), patka lastarka (*Anas acuta*), patka kašikara (*Anas clypeata*), patka krunata (*Aythya fuligula*), patka glavata (*Aythya ferina*), utva zlatokrila (*Tadorna ferruginea*), utva morska (*Tadorna tadorna*), guska divlja (*Anser anser*), guska glogovnjača (*Anser fabalis*), guska lisasta (*Anser albifrons*), labud crvenokljuni (*Cygnus olor*), labud žutokljuni (*Cygnus cygnus*), ronac veliki (*Mergus merganser*), ronac srednji (*Mergus serrator*), ronac mali (*Mergus albellus*).
- **Čaplje** (*Ardeidae*): čaplja siva (*Ardea cinerea*), čaplja danguba (*Ardea purpurea*), čaplja žuta (*Ardeola ralloides*), čaplja bijela (*Egretta garzetta*), gak kvakavac (*Nyctocorax nyctocorax*), bukavac – nebogled (*Botaurus stellaris*), čapljica mala (*Ixobrychus minutus*).
- **Rode** (*Coonidae*): bijela roda (*Coconia coconia*), crna roda (*Ciconia nigra*).
- **Ražnji** (*Threskiornithidae*): ražan blistavi (*Plegadis fascinellus*), žiličarka bijela (*Platalea leucordia*).
- **Pelikani** (*Pelecanidae*): nesit ružičasti (*Pelecanus onocrotalus*), nesit kudravi (*Pelecanus crispus*).
- **Jastrebovi** (*Accipitridae*): sup bjelogravi (*Gyps fulvus*), sup smeđeglavi (*Aegypius monachus*), kostoberina žutoglava-bradan (*Gypeatus barbatus*), strvinar bijeli (*Neophron percnopterus*), orao suri (*Aquila chrysaetos*), orao krstač (*Aquila pomorina*), orao štekavac (*Haliaeetus albicilla*), orao ribar (*Pandion haliaetus*), škanjac mišar (*Buteo buteo*), škanjac gaćaš (*Buteo lagopus*), jastreb kokošar (*Accipiter gentilis*), kobac ptičar (*Accipiter nisus*), eja

- močvarica (*Circus aeruginus*), eja livadarica (*Circus pygargus*), eja stepska (*Circus macrourus*), lunja crna (*Milvus migrans*), lunja hrđasta (*Milvus milvus*).
- **Sokolovi** (*Falconidae*): soko sivi (*Falco peregrinus*), soko kragujac (*Falco subbuteo*), soko smeđi (*Falco sherrug*), soko južni (*Falco biarmicus*), soko kraguljčić (*Falco columbarius*), vjetruša kliktava (*Falco tinnunculus*), vjetruša kopčić (*Falco vespertinus*), vjetruša bjelonokta (*Falco naumanni*).
 - **Ždralovi** (*Gruidae*): sivi ždral (*Grus grus*).
 - **Liske** (*Rallidae*): liska crna (*Fulica atra*), kokošica mlakara (*Rallus aquaticus*), zelenonoga mlakuša (*Gallinula chloropus*), hariš prđavac (*Crex crex*), štijaka kušica (*Porzana pusilla*), štijaka riduka (*Porzana porzana*).
 - **Droplje** (*Otididae*): droplja velika (*Otis tarda*), droplja mala (*Teatrax tetra*).
 - **Vivci** (*Chardriidae*): vivak (*Vanellus vanellus*).
 - **Šljuke** (*Scolopacidae*): šljuka šumska (*Scolopax rusticola*), barska šljuka-šljuka kokošica (*Gallinago gallinago*), šljuka livadarka (*Gallinago media*), šljuka kozica-mala bokasina (*Lymnocyptes minimus*), mrka prutka (*Tringa ochropus*), crvenonoga prutka (*Tringa totanus*), crvenorepa muljača (*Limosa limosa*), muljača smeđa (*Limosa lapponica*).
 - **Pomornici** (*Stercorariidae*): kratkorepi pomornik (*Stercorarius parasiticus*), širokorepi pomornik (*Stercorarius pomarinus*).
 - **Galebovi** (*Laridae*): galeb riječni (*Larus ridibundus*), galeb srebrni (*Larus argentatus*), galeb obično (*Larus caonus*), galeb mali (*Larus minutus*), galeb crni mediteranski (*Larus melanocephalus*).
 - **Čigre** (*Sternidae*): čigra obična (*Sterna hirundo*), čigra mala (*Sterna albifrons*), čigra crna (*Chlidonias niger*).
 - **Golubovi** (*Columbidae*): golub divlji (*Columba livia*); golub grivnjaš (*Columba palumbus*), golub dupljaš (*Columba oenas*), grlica (*Streptopelia turtur*), gugutka-kumrija (*Streptopelia decaocto*).
 - **Sove** (*Strigidae*): velika ušara-buljina (*Bubo bubo*), sova šumska (*asio otus*), ušara šumska (*Strix aluco*), ćuk (*Athene noctua*), kukuvija (*Tyto alba*).
 - **Vranci, kormorani** (*Phalacrocoracidae*): vranac veliki-kormoran (*Phalacrocorax carbo*), vranac kukmaš (*Phalacrocorax aristotelis*), vranac mali (*Phalacrocorax pygmaeus*).
 - **Gnjurci** (*Podicipedidae*): gnjurac ćubasti (*Podiceps cristatus*), gnjurac ridoglav (*Podiceps grisegena*), gnjurac zlatouhi (*Podiceps nigricollis*), gnjurac ušati (*Podiceps auritus*), gnjurac mali (*Podiceps ruficollis*).
 - **Pljenori** (*Gavidae*): pljenor srednji (*Gavia arctica*), pljenor mali (*Gavia stellata*).
 - **Vrane** (*Corvidae*): gavran (*Corvus corax*), vrana siva (*Corvus cornix*), gačac (*Corvus frugilegus*), čavka (*Corvus monedula*), kreha-sojka (*Garrulus glandarius*), svraka (*Pica pica*), kreha lješnikara (*Nucifraga caryocatactes*), galica planinska (*Pyrrhocorax graculus*), galica crvenokljuna (*Pyrrhocorax pyrrhocorax*).

Ako se na teritoriji Federacije pojavi ili unese nova životinjska vrsta, njezin status divljači privremeno će odrediti federalni ministar poljoprivrede, vodoprivrede i šumarstva (u daljem tekstu: federalni ministar), dok se to pitanje ne uredi zakonom.

Član 14.

Uzgoj i zaštita divljači obuhvata sve mjere i radnje propisane lovno-privrednom osnovom, a naročito:

- lovostaj za određene vrste divljači;
- privremenu zabranu lova divljači;
- provođenje radnji koje uvjetuju opstanak i razmnožavanje divljači koja trajno ili sezonski živi u lovištu, te mjere za očuvanje i poboljšanje staništa;
- održavanje utvrđene brojnosti, omjera spolova i starosti populacije divljači koja se uzgaja;
- osiguravanje uvjeta za razmnožavanje i vođenje mladunčadi;
- unošenje i čuvanje divljači radi postizanja brojnosti utvrđene lovnogospodarskom osnovom i programom uzgoja;
- osiguranje provođenja preventivnih dijagnostičkih, kurativnih i higijensko-zdravstvenih mjera u lovištima i ostalim prostorima gdje se divljač uzgaja ili obitava radi zdravstvene zaštite divljači;
- smanjivanjem broja divljači koja čini štetu na podnosiv broj, te uklanjanje pasa i mačaka skitnica;
- spašavanje divljači od elementarnih nepogoda;
- provođenje mjera za osiguranje dovoljne količine kvalitetne hrane i pitke vode;
- podizanje i održavanje lovnotehničkih i lovnogospodarskih objekata;
- poduzimanje preventivnih mjera (istjerivanje divljači) prilikom obavljanja poljoprivrednih i drugih radova, te upotrebu zaštitnih naprava na poljoprivrednim strojevima;
- upotrebu sredstava za zaštitu bilja ili drugih hemijskih sredstava na propisan način i preduzimanjem preventivnih mjera pri njihovoj upotrebi ili paljenja strništa, kukuruzišta, tršćaka i sl.;
- korištenje određenih pasmina radno ispitanih lovačkih pasa;
- čuvanje lovišta;
- suzbijanje nezakonitog lova;
- poboljšanje staništa divljači;
- higijensko – zdravstvene mjere;
- sprečavanje smanjenja i presijecanja površina;
- uklanjanje štetočina.

Za vrijeme zabrane lova ili lovostaja određena vrsta divljači se nesmije loviti, proganjati ili namjerno uznemiravati, ako zakonom nije drukčije određeno.

Zabranjeno je da se lovljenjem ili na drugi način ugrozi opstanak bilo koje vrste divljači u prirodi.

Odstrijel bolesne ili ranjene divljači (sanitarni odstrijel) dozvoljen je i u vrijeme zabrane lova i lovostaja.

Zabranjeno je: loviti ženku dlakave divljači kada je visoko bremenita ili dok vodi mladunčad, te pernatu divljač kad sjedi na jajima i dok hrani mladunčad, uništavanje i prisvajanje mladunčadi, te uništavanje i oštećivanje legla, gnijezda i jaja divljači.

Izuzetno od stava 5. ovog člana može se dopustiti lov za potrebe nauke, nastave, lovnu obuku ptica grabljivica, za potrebe zooloških vrtova, muzeja, te sokolarskih i kinoloških priredbi uz predhodno odobrenje federalnog ministra.

U postupku izdavanja odobrenja korisnici ove vrste lova dužni su podnijeti izvještaj Federalnom ministarstvu o razlozima lova, količini i vrsti divljači, vremenu vršenja lova, mjestu načinu i sredstvima lova, a sve to uz sudjelovanje nadležnog inspektora, predstavnika Federalnog ministarstva i korisnika lovišta (a po potrebi i drugih zainteresiranih stranaka), uz uvjet da se sačini zapisnik na licu mjesta o preduzetim radnjama.

Federalni ministar ukinut će odobrenje iz stava 6. ovog člana u slučajevima kada korisnik postupi suprotno odredbama stava 7. ovog člana.

Član 15.

Za zaštićenu, određuje se sljedeća divljač:

1. **dlakava divljač:** divokoza, srna, vidra, muflon, kozorog, mrki medvjed, jelen lopatar, zec, vjeverica, puh, ris,
2. **pernata divljač:** prave koke, divlje patke, divlje guske, šljuke, čaplje (osim sive čaplje), rode, labudovi, supovi – lešinari, orlovi, škanjci, eje, lunje, sokolovi, nesiti, sivi ždral, jastrebovi, droplje, liske, žalarke, prutke, muljače, vivak pozvizdač, pomornici, galebovi, čigre, kirgiska sađa, golubovi, sove, ronci, vranci, gnjurci, pljenori, gavran, galica, čolica i galica crvenokljuna.

Korisnik lovišta može proglasiti zaštićenom i divljač koja nije navedena u stavu 1. ovog člana.

Član 16.

Stalna zabrana lova, u skladu sa «Crvenom listom», određuje se za sljedeće vrste zaštićene divljači: vidra, ris, vjeverica, koka velikog tetrijeba, mali tetrijeb i njegova koka, koka šumske jarebice, čaplje (osim sive čaplje), rode, labudovi, supovi – lešinari, orlovi, škanjci, eje, lunje, sokolovi, nesiti, sivi ždral, jastrebovi, droplje, liske (osim crne liske), žalarke, prutke, muljače, vivak pozvizdač, pomornici, galebovi, čigre, kirgiska sađa, sove, ronci, vranci, gnjurci, pljenori, galica, čolica i galica crvenokljuna.

Član 17.

Lovostajem zaštićena divljač je: mrki medvjed na uzgojnim područjima, srna, divokoza, jelen lopatar, muflon, kozorog, zec, vuk, kuna, divlja svinja, veliki tetrijeb-mužijak, fazan, prepelica, jarebica kamenjarka, jarebica poljska, jarebica šumska-mužijak, šljuke, divlji golubovi, grlica, divlje patke, divlje guske i crna liska.

Uzgojno područje za medvjeda iz stava 1. ovog člana obuhvata prostore na kojima postoje ekološki i prirodni uslovi za njegov opstanak (razvoj i reprodukcija).

Uzgojna područja mogu se ustanoviti i za druge vrste zaštićene divljači.

Uzgojna područja ustanovljava federalni ministar na prijedlog kantonalnog ministra nadležnog za poslove šumarstva (u daljem tekstu: kantonalni ministar) i pribavljenog mišljenja lovačkog saveza, odnosno kantonalnih ministara ako se lovište nalazi na području više kantona.

Izvan uzgojnog područja medvjed nije zaštićen.

Lovostaj se ne odnosi na divljač koja se uzgaja u ograđenom prostoru čija je površina manja od 1,0 ha.

Član 18.

Privremena zabrana lova se određuje za vrste divljači čija je brojnost u lovištu osjetno smanjena usljed vremenskih nepogoda, bolesti, požara ili iz nekih drugih razloga, a koju treba zaštititi za određeno vrijeme u cilju povećanja njihove brojnosti.

Zabranu iz stava 1. ovog člana određuje korisnik lovišta.

Zabranu iz stava 1. ovog člana propisuje federalni ministar za područje više kantona i kantonalni ministar za područje kantona, ako tu zabranu ne odredi korisnik lovišta.

Član 19.

Ako od zaštićene divljači nastupi neposredna opasnost po život i zdravlje ljudi ili za državnu imovinu i za imovinu građana, zaštićena divljač može se odstreliti, odnosno njen broj smanjiti bez obzira na vrijeme zaštite i godišnji plan gazdovanja.

Odobrenje za smanjenje broja zaštićene divljači i način izvršenja izdaje federalni ministar na osnovu zahtjeva zainteresovanih, a po pribavljenom mišljenju korisnika lovišta, i nadležne veterinarske službe.

Član 20.

Ako se za zaštitu poljoprivrednih i šumskih kultura upotrebljavaju hemijska sredstva štetna za zaštićenu divljač, upotreba tih sredstava mora se vršiti na način koji je najmanje opasan za divljač.

Radi preduzimanja preventivnih mjera vlasnici odnosno korisnici zemljišta dužni su da najmanje tri dana prije upotrebe sredstava obavijeste korisnika lovišta o mjestu, vremenu i načinu upotrebe sredstava iz stava 1. ovog člana.

Član 21.

Zabranjen je lov ptica i sisavaca korisnih za poljoprivredu i šumarstvo, kao i kvarenje i uništavanje njihovih gnijezda i legala i skupljanje i uništavanje mladunčadi i jaja, ako ovim Zakonom nije drukčije određeno.

Zabranjeno je hvatanje divljači i držanje u zatvorenom ili ograđenom prostoru ako ovim Zakonom nije drugačije rješeno, odnosno ako to nije u svrhu uzgoja divljači ili poboljšanja prirodnog fonda iste vrste.

Član 22.

Vlasnici ne smiju puštati pse da se bez kontrole kreću po lovištu.

Korisnik lovišta dužan je da uklanja pse i mačke koji se kreću bez kontrole po lovištu na udaljenosti većoj od 300 m od naseljenih objekata.

Član 23.

Ovčarski psi mogu biti u lovištu samo uz stado.

Pse i mačke njihovi vlasnici, a pastiri pastirske pse, ne smiju puštati da se kreću lovištem **bez nadzora** na udaljenosti 300 m od nastambe vlasnika, odnosno stada.

Korisnik lovišta ima pravo i dužnost u lovištu ukloniti pse i mačke koji se kreću lovištem protivno odredbi stava 2. ovog člana bez naknade vlasniku psa ili mačke.

Nije dozvoljeno ukloniti lovačke pse koji u organiziranom lovu, na ispitima ili utakmicama pasa u gonjenju divljači prijeđu u drugo lovište.

Vlasnici pasa su odgovorni za štetu koju njihovi psi učine u lovištu i istu nadoknađuju korisniku lovišta.

Član 24.

Federalni ministar propisat će vrijeme lova lovostajom zaštićene divljači i utvrditi koje se ptice i sisari smatraju korisnim za poljoprivredu i šumarstvo.

Akt iz stava 1. ovog člana, propisat će se po prethodno pribavljenom mišljenju kantonalnog ministra.

Član 25.

Ograđivanje lovišta, čija površina ne može biti manja od 600 ha, u cilju intezivnog gazdovanja, ako nije predviđeno lovnom osnovom, može se vršiti samo uz odobrenje Federalnog ministarstva.

Član 26.

Naseljavanje novih vrsta divljači vrši se na osnovu odobrenja Federalnog ministarstva na prijedlog kantonalnog ministarstva.

Odobrenje se odnosi na prijedlog kantonalnog ministarstva.

Naseljavanje iz stava 1. ovog člana vrši se uz prisutnost nadležnog inspektora, predstavnika ministarstva i korisnika, kao i drugih lica na licu mjesta, uz obavezu da se sačini zapisnik i konstatuju urađene radnje.

Uz zahtjev za odobrenje korisnik lovišta dostavlja stručno mišljenje i uvjerenje o zdravstvenom stanju divljači koja se naseljava.

Član 27.

Izuzetno na osnovu odredaba člana 20. stav 2. ovog zakona za potrebe naučnog istraživanja, obrazovanja, zooloških vrtova, muzeja, naseljavanje lovišta i suzbijanja zaraznih bolesti, federalni ministar može odobriti hvatanje i držanje divljači u zatvorenom, odnosno, ograđenom prostoru.

Za potrebe treninga i ispitivanje urođenih osobina lovačkih pasa, kantonalni ministar može odobriti držanje nezaštićene divljači u ograđenom prostoru, na zahtjev korisnika lovišta.

U slučajevima iz st. 1. i 2. ovog člana u odobrenju će se propisati način i mjere koje će se pri tome provoditi, te rok važnosti odobrenja.

Član 28.

Zabranjeno je:

- žetva i košenje poljoprivrednim mašinama koje nemaju ugrađene uređaje za plašenje i isterivanje divljači;
- paljenje korova, strnjika, trstika, trave i drugih rastinja u lovištima;
- oblaganje otvorenih kanala, akumulacija, jezera i obala vodotoka plastičnim i drugim materijalima na način na koji bi ugrožavao divljač;
- upotreba hemijskih preparata na način i u količini koji ugrožavaju zdravlje i opstanak divljači;
- odlagati otpad, smeće ili zagađujuće tvari u prostoru lovišta.

Korisnici lovišta obavezni su iz lovišta ukloniti otpad i smeće i imaju pravo za naknadu troškova od fizičkog ili pravnog lica koji su otpad ili smeće deponovali u lovištu, odnosno moraju održavati i poboljšati životne prostore za divljač poštujući zahtjeve prirodnog gospodarenja šumama (stvarati prostor za parenje i odmor divljači) i zahtjeve zaštite životinja i biljaka, te zahtjeve javnosti.

Član 29.

Trovanje divljači je zabranjeno.

Izuzetno od stava 1. ovog člana, federalni ministar može na zahtjev zainteresovanih odobriti trovanje određene vrste divljači u slučaju neposredne opasnosti koja od te divljači zaprijeti životu ili zdravlju ljudi, zdravlju domaćih životinja ili opstanku zaštićene divljači.

Uz zahtjev se obavezno dostavlja stručno mišljenje o razlozima davanja odobrenja za trovanje određene vrste divljači

U odobrenju za trovanje divljači određuje se način i vrijeme upotrebe otrova i lice odgovorno za te poslove.

Član 30.

Zabranjeno je unošenje u lovište oružja koje nije lovačko (vojničko, poluautomatska puška sa više od dva metka, malokalibarsko oružje i samostrel.).

Zabranjeno je kretati se van javnih puteva ili voziti po tuđem lovištu sa lovačkim oružjem koje nije u futroli ili prtljažniku automobila i ispražnjeno.

IV - LOVIŠTA

Član 31.

Lovištem, u smislu ovog zakona smatraju se površine zemljišta, šuma i voda koje predstavljaju prostornu, prirodnu i lovno-privrednu cjelinu u kojoj postoje uslovi za trajan opstanak, uzgoj, razmnožavanje, zaštitu i korištenje divljači, bez obzira na vlasništvo.

Lovište ustanovljava kantonalna skupština na prijedlog kantonalnog ministarstva.

Akt o ustanovljavanju lovišta sadrži: naziv lovišta, granice i ukupnu površinu lovišta, vrste divljači koje ga naseljavaju, divljač koja je pod posebnom zaštitom i druge potrebne podatke.

Lovišta koja se prostiru na površinama šuma sa posebnom namjenom (naučnog, kulturnog, vjerskog, historijskog i dr. značaja) kao i na površinama koje predstavljaju izuzetno pogodna staništa rijetkih, prorjeđenih i vrijednih vrsta divljači, Vlada Federacije Bosne i Hercegovine (u daljem tekstu: Vlada FBiH) na prijedlog federalnog ministra može proglasiti posebnim lovištem uz predhodno pribavljeno mišljenje kantonalnog ministra.

Ako se lovište nalazi na području dva ili više kantona, mišljenje za formiranje posebnog lovišta daju sporazumno kantonalni ministri.

Aktom o osnivanju lovišta iz predhodnog stava Vlada FBiH određuje i korisnika lovišta.

Član 32.

Lovnim površinama se nesmatraju naselja, groblja, javni putevi, plantažni voćnjaci i vinogradi, parkovi u naseljima, objekti za liječenje, odmor i rekreaciju, aerodromi, dvorišta industriskih i drugih objekata, kao i drugi objekti utvrđeni posebnim propisima.

Ograđeni prostori za vještački uzgoj divljači se, takođe, ne smatraju lovnom površinom.

Član 33.

Lovišta su dolinska (nizijska), brdska i planinska.

Nizinskim lovištem smatra se lovište u kojem je preko 50% površine ispod 400 m nadmorske visine.

Brdskim lovištem smatra se lovište u kojem je preko 50% površine lovišta između 400 i 1.000 m nadmorske visine.

Planinskim lovištem smatra se lovište u kojem je preko 50% površine iznad 1.000 m nadmorske visine.

Član 34.

Lovišta se mogu ustanoviti kao: otvorena lovišta, ograđena lovišta i uzgajališta divljači.

Otvoreno lovište je lovište u kojem je omogućena dnevna i sezonska migracija dlakave i pernate divljači. Ovo lovište ne može biti manje od 1.000 ha za nisku i 3.000 ha za visoku divljač.

Ograđeno lovište je lovište koje je ograđeno prirodnim (široki vodotoci, velike vodene površine i sl.) ili vještačkim (ograde ili slični uređaji ili građevine i sl.) preprekama koje sprečavaju ili znatno umanjuju mogućnost da divljač, koja se u njemu prvenstveno uzgaja, štiti i lovi, napusti tu površinu.

Ograđeno lovište obuhvata površinu na kojima postoje uslovi za intenzivni uzgoj, zaštitu, lov i korištenje divljači, a ne može biti manje od 600 ha.

Uzgajalište divljači obuhvata površine zemljišta veće od 100 ha, a manje od 2000 ha na kojima se mogu uzgajati pojedine vrste divljači za proizvodnju većeg broja kvalitetne i zdrave divljači namijenjene lovu i reprodukciji.

Izuzetno od stava 5. ovog člana, uzgajalište divljači može se ustanoviti na vlastitim površinama privrednog ribnjaka sa obalnim zemljištem ili rasadnicima i voćnim i loznim nasadima namijenjenim za intenzivnu proizvodnju.

Član 35.

Način određivanja granica lovišta unutar kantona, kao i postupak ustanovljavanja lovišta propisuje federalni ministar.

Korisnik lovišta je dužan vidljivo obilježiti granice lovišta.

Član 36.

Lovište se daje na gazdovanje korisniku lovišta, u skladu sa ovim zakonom i Zakonom o koncesijama ("Službene novine Federacije BiH", broj 40/02).

Jednom korisniku lovišta na gazdovanje se može dati više lovišta.

Korisnik lovišta, lovište ili njegove dijelove ne može davati pod zakup ili ustupiti drugom korisniku.

Član 37.

Vlada kantona na prijedlog kantonalne komisije za koncesije dodjeljuje koncesiju najpovoljnijem ponuđaču koji je ispunio i zadovoljio sve kriterije utvrđene u tenderu (poziv na javni tender) i visokog je ranga u odnosu na ostale ponuđače.

Lovište se daje na gazdovanje na određeno vrijeme.

Rok na koji se daje lovište ne može biti kraći od 10 godina, a ni duži od 30 godina.

Član 38.

Lovište se daje na gazdovanje jednom pravnom licu koje ponudi najpovoljnije uslove za gazdovanje lovištem i unapređenje lovišta (objekte, uređaje i druga sredstva za gajenje i zaštitu divljači, stručne kadrove i sl.)

Uslove gazdovanja lovištem iz stava 1. ovog člana propisuje federalni ministar.

Korisnik zemljišta i voda na kome je osnovano lovište ima, pod jednakim uslovima iz stava 2. ovog člana, pravo prvenstva u dobijanju lovišta na gazdovanje.

Korisnik kome je dato lovište na gospodarenje ne može to lovište ustupiti drugim fizičkim ili pravnim licima.

Član 39.

O predaji lovišta na gazdovanje zaključuje se ugovor između kantonalnog ministarstva i korisnika lovišta.

Ako se lovište daje pod koncesiju, ugovor o koncesiji mora obavezno sadržavati sve elemente iz člana 29. Zakona o koncesijama, ali, također, mora sadržavati: naziv lovišta, podatke o sudskoj registraciji korisnika lovišta, vrijeme na koje se daje lovište na gazdovanje, granice lovišta, procjenu brojnog stanja divljači, uslove kojih se korisnik lovišta mora pridržavati, mjere koje je korisnik lovišta dužan preduzeti u cilju unapređenja lovišta, uslove organizovanja i finansiranja lovočuvarske službe, odredbe provođenja lovno-privredne osnove, i visinu i način plaćanja nadoknade, kao i uvjete za raskidanje ugovora.

Pored elemenata iz stava 2. ovog člana ugovorene strane mogu ugovoriti i druge obligaciono – pravne elemente.

Član 40.

Ugovor o davanju lovišta na gazdovanje može se raskinuti:

- ako korisnik ne ispunjava uslove određene ovim Zakonom, ugovorom ili ne gazduje u skladu sa odredbama lovno-privredne osnove;
- ako je potrebno da se zemljište, šuma ili voda koristi u svrhe koje isključuju mogućnost bavljenja lovstvom;

O raskidu ugovora iz stava 1. ovog člana odlučuje kantonalno ministarstvo koje je dao lovište na gazdovanje.

Korisnik lovišta kojem je lovište oduzeto raskidom ugovora, ima pravo na naknadu uložениh, a neiskorištenih sredstava.

Visina naknade iz stava 3. ovog člana utvrđuje se sporazumom zainteresovanih ugovornih strana.

U slučaju kada se ne može postići sporazum o visini naknade, odlučuje nadležni sud.

Naknada za izgrađene objekte i uništenu divljač utvrđuje se za objekte prema knjigovodstvenoj vrijednosti, a za divljač prema cjenovniku.

Naknadu plaća korisnik lovišta kojem je lovište, odnosno dio lovišta, nakon raskida ugovora dato na gazdovanje.

Kantonalni, odnosno federalni inspektor za lovstvo, pokreće postupak oduzimanja lovišta u slučaju iz stava 1. alineja 1. ovog člana.

Član 41.

Korisnik lovišta je dužan da u roku od **šest mjeseci** od dana preuzimanja lovišta na gazdovanje obilježi granice lovišta.

Način obilježavanja granica lovišta propisuje federalni ministar.

Član 42.

Korisnik lovišta mora obezbjediti da planiranje i realizaciju stručnih poslova lovstva obavlja lice sa završenim VII stepenom obrazovanja, šumarskog smjera, koje je izučavalo tokom svog školovanja predmet - Lovstvo.

Član 43.

Ako se nakon provođenja postupka iz člana 36. ovog Zakona niko ne javi na oglas ili se od korisnika oduzme lovište po osnovu člana 39. tačka 1. ovog Zakona lovištem gazduje kantonalno ministarstvo.

Lovište koje putem oglasa nije moglo biti ustupljeno na korištenje u skladu sa stavom 1. ovog člana privremeno se daje na korištenje, bez konkursa, pravnom licu koje obavlja djelatnost lovstva ili udruženju, odnosno organizaciji lovaca do donošenja odluke o davanju lovišta na korištenje u skladu sa članom 36. ovog Zakona.

Ustupanje u pogledu stava 2. ovog člana može trajati najduže jednu godinu.

V - KATASTAR LOVIŠTA

Član 44.

Za svako lovište osniva se i vodi katastar lovišta.

Katastar lovišta osniva i vodi korisnik lovišta i jedan primjerak katastra dostavlja kantonalnom ministarstvu.

Korisnik iz stava 2. ovog člana dostavlja propisane podatke o katastru kantonalnom ministarstvu, najdalje do 30. aprila tekuće godine za proteklu lovnu godinu.

Sadržaj i način vođenja katastra lovišta propisuje federalni ministar.

VI - LOVNOPRIVREDNA OSNOVA I PLANIRANJE

Član 45.

Za svako lovište donosi se lovnoprivredna osnova.

Lovnoprivredna osnova je dugoročni planski dokument kojim se uređuje gospodarenje lovištem i divljači na desetogodišnji period..

Lovnoprivrednu osnovu donosi korisnik lovišta, za period od najmanje 10 godina.

Lovnoprivrednu osnovu korisnik lovišta dužan je donijeti najkasnije za jednu godinu od dana preuzimanja lovišta, a može je izraditi pravno lice registrirano za djelatnost lovstva, ili fizičko lice (šumarski inženjer, iženjer lovstva i zaštite prirode) sa obrtnicom za obavljanje te djelatnosti.

Odredbe lovnoprivredne osnove su obavezne i bez nje lov nije dozvoljen.

U finansiranju izrade lovnoprivredne osnove učestvuje 50% korisnik lovišta i 50% kantonalno ministarstvo, a ako se lovište daje pod koncesiju, koncesionar finansira ukupan iznos izrade lovnoprivredne osnove.

Član 46.

Federalno ministarstvo daje saglasnost na lovno-privrednu osnovu.

Izrada nove lovnoprivredne osnove mora biti završena četiri mjeseca prije isteka važeće lovnoprivredne osnove.

Federalno ministarstvo na osnovu prijedloga stručne komisije donosi rješenje o odobrenju lovno-privredne osnove ili daje primjedbe na ponuđenu osnovu.

Greške i nedostatke lovno-privredne osnove utvrđene od stručne komisije dužno je otkloniti lice kojem je povjerena izrada osnove.

Za lovišta koje je osnovala Vlada FBiH lovnoprivrednu osnovu odobrava Federalno ministarstvo.

Ako se lovište nalazi na području dva i više kantona, odobrenje na lovnoprivrednu osnovu sporazumno daju kantonalna ministarstva putem zajedničkog akta, a Federalno ministarstvo daje saglasnost na osnovu.

Finansiranje lovnoprivrednih osnova za posebna lovišta snosi Vlada Federacije.

Sastav, rad i troškove stručne komisije iz stava 2. ovog člana propisat će federalni ministar.

Član 47.

Lovno-privredna osnova sadrži naročito prikaz stanja lovišta, osnovne biološke i fizičke karakteristike lovišta, sastav divljači (kvantitet i kvalitet), ciljeve gazdovanja, vrste i obim radova, mjere i metode za postizanje ciljeva gazdovanja, kao i ekonomsko- finansijsku osnovu gazdovanja, program za unapređivanje lovstva i lovočuvarsku službu.

Prikaz stanja lovišta naročito sadrži podatke o površini lovišta, prirodnim i drugim uslovima za život i razvoj divljači, stanju fonda divljači, po pojedinim vrstama i prirastu divljači u lovištu.

Lovno-privrednom osnovom mora se, u skladu sa Zakonom, odrediti vrsta i broj divljači koja će se gajiti u lovištu kao i obim zaštite i iskorištavanja divljači.

Lovno-privredna osnova mora biti usklađena sa dugoročnim programom razvoja poljoprivredne proizvodnje i šumskoprivrednom osnovom za površine na kojima se lovište nalazi, kao i sa vodoprivrednom osnovom, prostornim planom i ratifikovanim međunarodnim ugovorom iz oblasti lova, zaštite prirode i prirodnih staništa divljači.

Član 48.

Do donošenja lovnoprivredne osnove korisnici lovišta gazduju lovištem na osnovu privremenog godišnjeg plana gazdovanja lovištem, a najduže jednu godinu.

Redovni godišnji plan gazdovanja sadrži naročito mjere za unaprjeđenje lovstva kao i obim korištenja pojedinih vrsta divljači i utvrđuju prostori u lovištu na kojima se mogu obučavati lovački psi.

Godišnji plan donosi se do 31. marta za period od 1. aprila tekuće do 31. marta naredne godine (lovna godina).

Lov se može vršiti tek poslije donošenja godišnjeg plana.

Godišnji plan dostavlja se kantonalnom ministarstvu najkasnije do 30. aprila, a izvještaj o izvršenju plana za proteklu godinu do 31. maja.

Saglasnost na godišnji plan gazdovanja lovištem daje kantonalno ministarstvo, a na godišnje planove gazdovanja za posebna lovišta daje federalno ministarstvo.

Lov se može vršiti nakon dobijene saglasnosti.

Član 49.

Bliži propis o sadržaju, načinu izrade i nosiocima izrade lovnoprivredne osnove lovišta, privremenog godišnjeg plana gazdovanja lovištem i godišnjeg plana gazdovanja lovištem donosi Federalno ministarstvo.

Izrada lovnoprivredne osnove i njihova revizija može se povjeriti pravnom licu koja je registrovano za tu djelatnost i ima uposleno stručno lice sa završenim šumarskim fakultetom ili inženjer lovstva i zaštite prirode.

Revizija lovnoprivredne osnove obavlja se kada se trajno ili bitno izmjene uslovi i okolnosti na kojima se temelji lovnoprivredna osnova a posebno usljed uginuća više od 1/3 divljači, požara, elementarnih nepogoda, trovanja i slično.

Revizija lovnoprivredne osnove vrši se po postupku propisanom za njeno donošenje

Član 50.

Korisnici lovišta dužni su voditi evidenciju o izvršenim radovima i provedenim mjerama predviđenim lovnoprivrednom osnovom i godišnjim planom.

Korisnik posebnih lovišta dužan je Federalnom ministarstvu dostaviti izvještaj o izvršenju godišnjeg plana gazdovanja za proteklu godinu.

Izvještaji iz st. 1. i 2. stava ovog člana dostavljaju se do 31. 03. tekuće godine.

Evidentiranje izvršenih radova iz st. 1. i 2. ovog člana upisuju se u obrasce koje donosi federalni ministar.

Član 51.

Sredstva koja korisnik lovišta ostvari u gazdovanju lovištem smiju se koristiti samo za gazdovanje i unapređenje lovstva ukoliko ovim Zakonom nije drugačije određeno.

Unapređenjem lovstva smatra se:

- zaštita, održavanje i poboljšanje životnih uslova za divljač u lovištu (poboljšavanjem ispasišta, dodatnim hranjenjem, održavanjem solila i pojilišta);
- dostizanje i održavanje odgovarajuće polne i starosne strukture pojedinih vrsta divljači u okviru utvrđenog kapaciteta lovišta;
- unošenje novih vrsta divljači u lovište;
- čuvanje i zaštita divljači i lovišta;
- izgradnja lovnouzgojnih i lovnotehničkih objekata;
- preduzimanje mjera za smanjenje šteta koje počini divljač;
- stručno osposobljavanje kadrova;
- izrada planskih dokumenata;
- naučno-istraživački rad u lovstvu;
- nabavka rasnih lovačkih pasa i
- izdavačka djelatnost

VII - LOV I UPOTREBA DIVLJAČI

Član 52.

Korisnici lovišta dužni su pri lovljenju i upotrebi divljači spriječiti sva neetička ponašanja u lovištu, uznemiravanje divljači u njenom staništu (naročito sa psima u vrijeme reprodukcije), otrovima, omamljujućim sredstvima i sl. čime se osigurava provođenje međunarodnih konvencija o zaštiti divljači i ptica.

Član 53.

Korisnici lovišta određiće svojim aktom ko može i pod kojim uslovima vršiti lov divljači, kao i učešće lovaca u korištenju ulova.

Član 54.

Odstrel divljači dozvoljen je samo lovačkom puškom kuglaricom sa izoliranim cijevi i puškom sačmaricom.

Izuzetno od stava 1. ovog člana odstrel medvjeda, kozoroga, muflona, srne i divokoze dozvoljen je samo lovačkom puškom kuglaricom sa izoliranim cijevi.

Zabranjen je lov divljači nabožima koji nisu lovački i lovačkom puškom s glatkim cijevima koja je izgrađena tako da sadrži više od dva metka istog kalibra, te poluautomatskim i automatskim oružjem s glatkim ili užljebljenim cijevima.

Zabranjen je lov krupne divljači, osim divljih svinja, prigonom, progonom ili sa psima.

Odredbe stava 3. ovog člana ne odnosi se na lov pernate divljači koja se umjetno uzgaja na površinama koje su namijenjene takvom uzgoju.

Način upotrebe lovačkog oružja i municije propisuje federalni ministar.

Član 55.

Divljač mogu loviti članovi lovačkih udruženja koji imaju položen lovački ispit.

Lica koja su kroz školovanje izučavala i položila predmet lovstvo oslobođena su polaganja lovačkog ispita.

Program, uslove i način polaganja lovačkog ispita, kao i izdavanje potvrda, odnosno uvjerenja o položenom ispitu propisuje federalni ministar.

Izuzetno od odredbe stava 1. ovog člana divljač mogu loviti:

- lovci pripravnici bez prava odstrela zaštićene divljači i pod nadzorom instruktora;
- strani i domaći lovci turisti u pratnji stručnog lica;
- diplomatski predstavnici u skupnim lovovima.

Komisiju za polaganje lovačkog ispita formira federalni ministar

Član 56.

Članovi lovačkih udruženja lov divljači visokog lova vrše na osnovu odobrenja za odstrel, a lov divljači niskog lova na osnovu lovne karte.

Strani i domaći lovci turisti love na osnovu odobrenja za odstrel (dozvole za lov).

Odobrenje za odstrel i lovnu kartu izdaje korisnik lovišta, a jedinstvene obrazce donosi federalni ministar.

Član 57.

Divljač je zabranjeno uznemiravati i loviti:

- u vrijeme kada je i na prostoru na kome divljač ugrožena poplavom, snijegom, požarom, poledicom i prirodnim nesrećama;
- otrovom, zamkama, gvoždama, klopnama i omamljujućim sredstvima, a ptice pomoću ljepkova i mreža ili drugih sredstava za masovno uništavanje;
- gađanjem iz motornih vozila, gaženjem motornim vozilima i gađanjem iz motornih čamaca;

- upotrebom reflektora (farova), gramofona, magnetofona, audio aparata i sličnim napravama, živih i umjetnih mamaca- vabila ili pomoću naprava koje djeluju na principu infra-crvenih zraka;
- vojničkim oružjem, vojničkom municijom, sportskim malokalibarskim i poluautomatskim lovačkim oružjem sa više od pet metka;
- hrtovima i nerasnim psima,
- papkastu lovostajem zaštićenu divljač pomoću pasa;
- medvjeda pogonom i prigonom;
- pticama grabljivicama i zvijerima;
- upotrebom luka i strijele osim lova na visoku divljač u ograđenim lovištima do 1000 ha;
- u noćima bez mjesečine (u noćnom lovu), i bez izgrađenih objekata za lov;
- sačmom na udaljenosti 200 m od naselja i puškom kuglaricom na udaljenosti od 500 m od naselja.

Izuzetno od stava 1. ovog člana, korisnik lovišta može odobriti noćni lov i sa improvizovanih objekata, ako je u pitanju sprečavanje šteta na poljoprivrednim imanjima, te može dopustiti hvatanje mladih divljih svinja u cilju suzbijanja svinjske kuge na način i pod uslovima propisanim u članu 59. ovog Zakona.

Nerasnim psima iz stava 1. alineja 6. ovog člana smatraju se psi koji nisu registrovani kod nadležne kinološke organizacije i koji nemaju odgovarajući rodovnik.

Zabranjeno je sa psima proganjati divljač van terena ograđenog za trening u vremenu od 05. januara do 31. jula.

Zabranjen je lov divljači u plantažnim voćnjacima i vinogradima, rasadnicima i drugim šumskim i poljoprivrednim površinama koje su ograđene ogradom kroz koju dlakava divljač ne može prolaziti, na površinama koje se koriste za vojne poligone i komunalne potrebe, kao i drugim površinama i objektima kada je to utvrđeno posebnim propisima.

Iznimno, od odredaba stava 1. ovog člana, osobi koja ima položen sokolarski ispit dopušten je lov divljači pticama grabljivicama koje su za to posebno školovane.

Sokolarski ispit polaže se pred Komisijom za polaganje lovačkog ispita koja se formira pri Federalnom ministarstvu.

Program sokolarskog ispita i način lova divljači s pticama grabljivicama (sokolarenje) propisuje federalni ministar.

Član 58.

U lovu se smiju isključivo koristiti čistokrvni lovački psi sa položenim ispitom urođenih osobina, potrebnim ispitom u radu propisanim za svaku pasminu pojedinačno koji posjeduje rodni list jedne od članica Međunarodne kinološke federacije (FCI) i koji imaju pozitivnu ocjenu u obliku (eksterijeru).

Kinološki savezi Federacije Bosne i Hercegovine izdaje rodovnik kojim se dokazuje čistokrvnost i pasminska pripadnost, propisuje uslove za ispit urođenih osobina i svaki pojedini radni ispit, te izdaje certifikat za položene radne ispite.

Vrstu i broj pasa za lov na pojedine vrste divljači u određenim područjima propisuje federalni ministar.

Član 59.

Izuzetno od odredbe člana 57. stav 1.al. 2. i 4. federalni ministar može odobriti korisniku lovišta hvatanje divljači mrežama, klopama i omamljujućim sredstvima, ali samo za: naučne svrhe, vještački uzgoj, preseljenje u druga lovišta, kao i za potrebe zooloških vrtova i izvoz.

Član 60.

Kantonalni ministar može propisati da se na zemljištima zasijanim ili zasađenim određenim poljoprivrednim kulturama može zabraniti lov divljači u vrijeme kada bi to štetilo tim kulturama.

Član 61.

Tereni za obuku i trening lovačkih pasa određuju se lovno-privrednom osnovom. U tu svrhu može se izdvojiti najviše do 5% ukupne površine lovišta.

Član 62.

Ulovljena ili uginula divljač i njeni dijelovi pripadaju korisniku lovišta.

Za korišćenje divljači i njenih dijelova, kao i pružene usluge u lovištu korisniku lovišta plaća se naknada osim u ograđenim prostorima za obuku pasa.

Ulovljena ili uginula divljač i njeni dijelovi na površinama izvan lovišta pripadaju kantonalnom ministarstvu ili licima kojim je povjerena zaštita divljači na tim površinama.

Lovac, član lovačkog udruženja koje je korisnik lovišta, plaća za korišćenje divljači i njenih dijelova :

- za visoku divljač 40% od tržišne vrijednosti,
- za nisku divljač 25% od tržišne vrijednosti.

Strani i domaći lovci turisti za korišćenje divljači i njenih dijelova i drugih usluga plaćaju punu tržišnu cijenu.

Cijenovnik odstrjela i korišćenja divljači te drugih usluga u lovištu na bazi tržišne vrijednosti donosi federalni ministar.

Član 63.

Ulovljena ili uginula divljač i njeni dijelovi mogu se iznositi iz lovišta samo uz potvrdu korisnika lovišta.

Potvrdu o porijeklu divljači i njenih dijelova na propisanom obrascu izdaje korisnik lovišta.

Obrazac potvrde o porijeklu divljači i njenih dijelova iz stava 2. ovog člana i uslove pod kojima se može vršiti prepariranje divljači i držanje trofeja javno izloženih u objektima kao i upotreba mesa divljači u ugostiteljskim objektima donosi federalni ministar.

Član 64.

Trofejima od divljači, u smislu ovog Zakona, smatraju se rogovi srndaća, jelena lopatara, jelena, divojarca, divokoze, muflona i alpskog kozoroga, kljove divljeg vepra, lobanja i krzno medvjeda, vuka i divlje mačke, lobanja jazavca i lisice kao i cijeli primjerak velikog i malog tetrijeba.

Trofeji od divljači mogu se iznositi iz lovišta samo uz trofejni list.

Korisnik lovišta izdaje trofejni list i vodi evidenciju o izdatim trofejnim listovima.

Član 65.

Trofej ocjenjuje komisija komisija od tri člana koju formira korisnik lovišta.

Komisija iz stava 1. ovog člana vrši ocjenu trofeja na osnovu standarda Međunarodnog savjeta za lovstvo i zaštitu divljači (u daljem tekstu: CIC) .

Članovi komisije iz stava 1. ovog člana moraju da imaju položen ispit za ocjenjivanje trofeja.

Program i način polaganja ispita iz stava 3. ovog člana donosi Lovački savez.

Član 66.

Bliže propise o obliku obrazca, sadržini, načinu i postupku izdavanja potvrda i trofejnog lista donosi federalni ministar.

Član 67.

Vrhunskim trofejima smatraju se tri po broju CIC poena najjača trofeja određene vrste divljači u Federaciji na osnovu banke podataka o vrijednim trofejima.

Banku podataka o vrijednim trofejima vodi Lovački savez.

Korisnici lovišta dužni su nadležnom Lovačkom savezu dostaviti podatke iz trofejnog lista, za trofeje vrijednosti bronzane medalje pa naviše.

Vrhunski trofej je vlasništvo onog ko je divljač odstrelio, ali se ne može iznijeti van teritorije Federacije sve dok po vrijednosti (CIC poena) ne dođe na 4. mjesto.

Korisnik lovišta dužan je upoznati stranog državljanina prije odlaska u lov sa propisima koji vrijede za vrhunske trofeje.

Obavještenje o izlaženju određenog trofeja iz kategorije vrhunskih daje Lovački savez.

Izuzetno stava 4. ovog člana, federalni ministar na prijedlog Lovačkog saveza ili Lovačkog udruženja, može odobriti iznošenje vrhunskog trofeja izvan teritorije Federacije.

Bliži propis banke podataka vrijednih trofeja, kategorije vrhunskih trofeja i trajanju tog akta odredit će federalni ministar posebnim aktom.

VIII - SPREČAVANJE I NADOKNADA ŠTETE

Član 68.

Korisnik lovišta dužan je preduzimati mjere za sprečavanje šteta koju divljač može učiniti imovini ili ljudima na zemljištu i vodi na kojima se nalazi lovište (održavanje broja divljači prema kapacitetu lovišta, obezbjeđenje prehrane u lovištu, postavljanje čuvara i dr.)

Vlasnici zemljišta i stoke odnosno korisnici zemljišta na kome je ustanovljeno lovište dužni su na zemljištu, objektima gdje stoka prebiva i opremi koja se koristi u obradi zemlje preduzimati uobičajene mjere za sprečavanje šteta od divljači i na divljači (efikasnim ogradama, električnim pastirom, postavljanjem plašila, zaštitom mladih sadnica omotavanjem ili premazivanjem, ispašom stoke sa čobanom na površinama dozvoljenim za pašu, postavljanjem plašilica na kosačice i kombajne, učešćem u organizovanom pogonu i sl.)

Mjere iz stava 2. ovog člana propisuje kantonalni ministar.

Korisnik lovišta i korisnici zemljišta i voda na čijem je području ustanovljeno lovište, kao i korisnici okolnih zemljišta i voda, mogu pitanje naknade štete koju divljač učini regulisati i međusobnim sporazumom (ugovaranje paušalne naknade, osiguranje kod osiguravajućeg društva i sl.).

Član 69.

Ako se radnjama odnosno mjerama iz člana 68. stav 1. ovog Zakona, učini šteta, korisnik lovišta je dužan nadoknaditi štetu vlasniku, odnosno korisniku zemljišta na kojem se nalazi lovište.

Član 70.

Za štetu koju počini lovostajem zaštićena divljač odgovoran je korisnik lovišta u čijem je lovištu šteta učinjena, ukoliko je oštećeni preduzeo propisane mjere zaštite.

Štetu koju počini divljač za koju je propisana stalna ili privremena zabrana lova dužan je nadoknaditi onaj ko je propisao zabranu.

Izuzetno za štetu koji učini medvjed na utvrđenim uzgojnim područjima naknadu plaća Federacija u visini od 45%, kantoni u visini od 25% i korisnik lovišta u visini od 30% procjene štete.

Nema odgovornosti za štetu koju je učinio medvjed na stoci bez čobana kao i u područjima gdje je paša zabranjena.

Obaveza oštećenog je da sačuva sve tragove koji ukazuju na učinjenu štetu.

Član 71.

Za štetu koju prilikom lova divljači učine lovci i njihovi pomoćnici odgovoran je korisnik lovišta, a korisnik lovišta ima pravo regresa od lovaca, odnosno njihovih pomoćnika.

Član 72.

Fizička i pravna lica koji odstrijele, ili nanesu štetu divljači bespravnim lovom, ili na drugi nezakonit način, dužni su korisniku lovišta u čijem lovištu ta divljač stalno boravi, nadoknaditi štetu prema odštetnom cjenovniku, a u slučaju spora određuje se nadležnost suda prema mjestu nastanka štete.

Odštetni cjenovnik iz stava 1. ovog člana donosi federalni ministar.

Sporove o nadoknadi štete iz stava 1. ovog člana rješava nadležni sud.

Član 73.

Prijava o pričinjenoj šteti od divljači podnosi se nadležnom kantonalnom ministarstvu odmah, a najkasnije u roku od tri dana od dana kada je šteta nastala.

Kantonaln ministarstvo dužano je odmah, a najkasnije 3. dana po prijemu prijave štete, da odredi komisiju za utvrđivanje uzroka štete i procjenu vrijednosti.

Komisiju sačinjavaju tri člana: predstavnik kantonalnog ministarstva (predsjednik komisije), stručno lice za procjenu vrijednosti štete (poljoprivredni ili veterinarski stručnjak) i stručno lice za utvrđivanje uzroka štete (vještak za lovstvo) šumarske, veterinarske, poljoprivredne ili biološke struke sa iskustvom na istim poslovima.

Komisija je dužna da odmah izvrši uviđaj i o svom radu sačini zapisnik. Na uviđaj se poziva oštećeni i korisnik lovišta.

Zapisnik komisije sadrži naročito: mjesto i način nastanka štete, znakove koji upućuju na određenu vrstu divljači, obim i visinu štete, kao i preduzete mjere oštećenog prije i posle počinjene štete.

Član 74.

Po prijemu zapisnika iz člana 73. stav 4. ovog Zakona kantonalno ministarstvo pokušaće sporazumno utvrditi štetu između oštećenog i korisnika, odnosno organa odgovornog za naknadu štete.

Sporazum o naknadi štete sadrži naročito visinu nadoknade i rok njene isplate.
Sporazum o nadoknadi štete ima snagu izvršnog naslova.

Ako ne dođe do sporazuma, oštećeni će se pravno uputiti za podnošenje tužbe nadležnom sudu u pogledu utvrđivanja štete i njene visine.

IX - LOVOČUVARSKA SLUŽBA

Član 75.

Korisnik lovišta dužan je da obezbjedi i organizuje lovočuvarsku službu.

Lovočuvarsku službu vrše lovočuvari kao službena (ovlaštena) lica zaposlena u lovištu.

Lovočuvari vrše dužnost naoružani lovačkim oružjem, u uniformi sa službenom oznakom -lovočuvar.

Lovočuvar može biti lice koje je završilo najmanje III stepen srednje škole, (šumarske, poljoprivredne ili veterinarske struke),koje je zdrastveno sposobno za obavljanje određenih poslova utvrđenih za to radno mjesto, sa položenim lovačkim i lovočuvarskim ispitom, koje ispunjava uslove za nošenje oružja kao i druge uslove utvrđene zakonom i aktima korisnika lovišta.

Lovočuvar posjeduje legitimaciju lovočuvara koju izdaje korisnik lovišta.

Federalni ministar propisati će vrstu uniforme, oznake, uslove za nošenje oružja, vrstu oružja i veličinu lovočuvarskog rejona.

Član 76.

Lovočuvar je ovlašten:

- da od lica zatečenog sa sredstvima za lov u lovištu zahtjeva da pokaže odobrenje za odstrjel odnosno lovačku kartu, i druge isprave kojima se utvrđuje identitet tog lica;
- da zahtjeva lične isprave od lica zatečenog u vršenju prekršaja ili kaznenog djela koji se odnose na lovstvo i od lica za koje postoji osnovna sumnja da je izvršilo tako dijelo ili prekršaj, ako nemože na drugi način da utvrdi identitet tog lica;
- radi pronalaženja predmeta kojima je izvršen prekršaj ili kazneno dijelo koji se odnose na lovstvo, vrši pregled vozila i drugih sredstava za prevoz i prenošenje stvari za koja postoji osnovna sumnja da prevoze odnosno prenose ulovljenu divljač, dijelove ulovljene divljači ili trofeje od divljači;
- pregledati ulov i sredstva za lov, kao i da utvrdi da li je lov obavljen u skladu sa propisima;
- privremeno oduzima i bez odlaganja predati nadležnom organu ulov, sredstva za lov, kao i druge predmete pronađene u lovištu, ako postoji osnovna sumnja da su upotrebljeni ili bili namjenjeni za izvršenje kaznenog dijela ili prekršaja koji se odnose na lov, ili da su nastali ili pribavljeni izvršenjem takvog kaznenog dijela ili prekršaja;
- odstraniti ranjenu i bolesnu divljač;
- obavještavati o pojavi bolesti ili uginuću divljači i opasnosti od elementarnih nepogoda.

Lovočuvar je dužan da licu od koga su oduzeti ulov, psi i drugi predmeti za lov izdati potvrdu o oduzimanju pomenutih sredstava.

Sa privremeno oduzetim sredstvima iz predhodnog stava korisnik ne može raspolagati (uništiti, prodati, predati, zamijeniti i sl.) do okončanja prekršajnog postupka ili postupka pred drugim nadležnim organom.

Zapisnik i potvrda o oduzimanju sredstava za lov koriste se u prekršajnom postupku kao dokaz uz prijavu za pokretanje prekršajnog postupka koji podnosi nadležni lovni inspektor ili oštećeni.

U slučajevima iz stava 1. ovog člana lice koje je zatečeno sa sredstvima za lov u lovištu dužno je, na zahtjev lovočuvara, pokazati odobrenje za odstrjel, odnosno lovačku kartu i ispravu kojim se utvrđuje njegov identitet, kao i omogućiti pregled ulova, sredstava za lov, pregled vozila i drugih sredstava za prijevoz i prenošenje stvari.

Član 77.

Obliku i sadržaju obrasca legitimacije lovočuvara, vođenje evidencija o izdatim legitimacijama i sadržaju službene knjige lovočuvara propisuje federalni ministar.

Lovočuvar je dužan voditi službenu knjigu.

Član 78.

Zahtjev za pokretanje sudskog postupka za bespravan lov, pričinjenu štetu na divljači i lovištu podnosi korisnik lovišta na osnovu izvještaja – prijave lovočuvara i drugih službenih lica.

X – NADZOR NAD PROVOĐENJEM OVOG ZAKONA

Član 79.

Federalno ministarstvo vrši upravni nadzor nad primjenom ovog Zakona i propisa donesenih na osnovu ovog Zakona koji su ovim Zakonom dati u nadležnost Federacije, kao i upravni nadzor nad radom ovlaštenih pravnih lica u prenijetim poslovima određenim ovim Zakonom koji predstavljaju vršenje javnih ovlaštenja.

Federalno ministarstvo vrši inspekcijski nadzor, daje stručna uputstva i objašnjenja u primjeni zakona nad radom pravnih lica kojima su povjerena javna ovlaštenja.

Federalno ministarstvo vrši i nadzor nad kantonalnim ministarstvima u dijelu izvršenja federalne politike u oblasti lovstva na teritoriji Federacije.

Kantonalna ministarstva vrše upravni nadzor nad provođenjem ovog Zakona i propisa donesenih na osnovu ovog Zakona koji su zakonom dati u nadležnost kantona, kao i upravni nadzor nad obavljanjem poslova određenih ovim Zakonom koji predstavljaju vršenje javnih ovlaštenja, a dati su u nadležnost kantona.

Član 80.

Inspekcijski nadzor nad provođenjem ovog Zakona vrše federalni lovni inspektori, federalni granični lovni inspektori i kantonalni lovni inspektori u skladu sa odredbama ovog Zakona i Zakona o šumama ("Službene novine Federacije BiH", broj 20/02, 29/03 i 37/04).

Federalni lovni inspektor ima sljedeće nadležnosti:

1. pregleda lovno-privrednu osnovu i provjerava kako se ona primjenjuje;
2. kontroliše primjenu godišnjeg plana gazdovanja lovištem, poslovne knjige i ostalu dokumentaciju kada je to potrebno radi kontrole primjene propisa i mjera koje se odnose na divljač i lovišta;
3. kontroliše rad lovačkih saveza u poslovima koji su im povjereni kao javna ovlaštenja ovim Zakonom;
4. kontroliše provođenje odredbi ovog Zakona o sanacijskom odstrjelu, odstrjel za naučnoistraživačke svrhe, kao i sokolarenje;
5. obavlja sve poslove i zadatke iz nadležnosti kantonalnog inspektora za lovstvo ukoliko ovaj iz bilo kojeg razloga ne obavlja poslove i zadatke utvrđene ovim Zakonom i propisima donesenim na osnovu njega.

Ukoliko nađe da je povrijeđen ovaj Zakon ili drugi propis donesen na osnovu njega federalni lovni inspektor ima pravo i obaveze:

- rješenjem narediti uklanjanje utvrđenih nedostataka, odnosno nepravilnosti u određenom roku;
- podnijeti nadležnom organu zahtjev za pokretanje prekršajnog postupka;
- poduzeti i druge mjere, odnosno izvršiti druge radnje za koje je posebnim propisima ovlašten.

Kantonalni lovni inspektor ima sljedeće nadležnosti:

1. kontroliše dali korisnik lovišta ispunjava propisane uslove za gospodarenje;
2. kontroliše da li je godišnji plan gospodarenja lovištem u skladu sa lovno-privrednom osnovom;
3. kontroliše lovljenje divljači, odobrenje za odstrjel divljači, lovne karte i trofejne listove za ulovljenu divljač;
4. pregleda radove i objekte u lovištu;
5. oduzima do odluke nadležnog organa bespravno ulovljenu ili bespravno prisvojenu uginulu divljač ili njene dijelove, kao i predmete kojima su izvršene ove bespravne radnje;
6. naređuje privremene mjere za sprečavanje štete u hitnim slučajevima u kojima bi mogla nastupiti šteta;
7. prikuplja, kad je to potrebno, obavještenje od svjedoka, vještaka, odgovornih i drugih lica;
8. vodi službene podatke za područje kantona o povredama ovog Zakona i propisa donesenih na osnovu njega;
9. obavještava nadležne organe federalne uprave o nepravilnostima i predlaže provođenje određenih mjera, ako sam nije ovlašten za preduzimanje odgovarajućih mjera;
10. podnosi prijavu za pokretanje prekršajnog postupka radi povrede odredaba ovog Zakona i propisa donesenih na osnovu njega;
11. preduzima i druge mjere i radnje za koje je ovlašten posebnim propisima.

Član 81.

Kada nadležni inspektor prilikom vršenja inspekcijaskog nadzora ustanovi da propis nije primijenjen, ili da je nepravilno primijenjen, donijet će rješenje kojim će naložiti otklanjanje utvrđenih nepravilnosti i odrediti rok u kome se one moraju otkloniti.

Protiv rješenja kantonalnog lovnog inspektora može se izjaviti žalba Federalnom ministarstvu u roku od osam dana od dana prijema rješenja.

Protiv rješenja kantonalnog ministarstva može se izjaviti žalba Federalnom ministarstvu u roku od 15 dana od dana prijema rješenja.

Protiv rješenja federalnog lovnog inspektora može se izjaviti žalba Federalnom ministarstvu u roku od osam dana od dana prijema rješenja.

XI - KAZNENE ODREDBE

Član 82.

Novčanom kaznom u iznosu od 5000,00 KM do 20.000,00 KM kazniće se za prekršaj pravno lice ako:

1. lovi zaštićenu divljač na zemljištima i vodama izvan lovišta (član 7. st.1. i2.);
2. za vrijeme zabrane lova ili lovostaja lovi, proganja ili namjerno uznemirava divljač (član 14. st. 2. i 3.);
3. dozvoli lov vrsta za koje je propisana stalna zabrana lova (član 16.) ili lovostajem zaštićenih vrsta za vrijeme trajanja lovostaja (član17.9 ili privremena zabrana lova (član 18.);
4. vrši smanjenje broja zaštićene divljači bez dozvole Federalnog ministarstva (član 19. st.2.);
5. postupi protivno odredbama člana 21. ;
6. vrši trovanje divljači (član 29. stav 1.);
7. vrši trovanje divljači bez odobrenja federalnog ministra (član 29. st.2.);
8. unosi u lovište oružje koje nije lovačko i postupi sa njima suprotno odredbama člana 30. ;
9. korisnik lovišta da u podzakup, ili ustupi drugom korisniku lovište (član38. st.4.);;
10. korisnik lovišta ne osigura obavljanje stručnih poslova licima predviđenim u članu 42.;
11. korisnik lovišta ne vodi kataster lovišta na način kako je propisano članom 44.;
12. na vrijeme ne donese lovno-privrednu osnovu (član.45. i 46.);
13. ne donese i ne dostavi na odobrenje u propisanom roku privremeni plan gospodarenja i godišnji plan gospodarenja lovištem (član 48.);
14. ne donese opći akt iz člana 53.;
15. postupi protivno odredbama člana 56. st.1 i 2. i čl. 57. st.1. al. od1. do 12. i st. 4. i 5.;
16. ne osigura i ne organizira lovočuvarsku službu na način kako je propisano članom 75.;
17. lovnom inspektor ne omogući pregled na osnovu ovlaštenja iz člana 80.

Za prekršaje iz stava 1. ovog člana kaznit će se novčanom kaznom u iznosu od 1.000 KM do 2.000 KM i odgovorno lice u pravnom licu.

Za privredni prestup iz stava 1. ovog člana kaznit će se novčanom kaznom od 1000,00 do 2000,00 KM odgovorno lice u pravnom licu.

Član 83.

Novčanom kaznom u iznosu od 2.000,00 do 10.000,00 KM kaznit će se za prekršaj pravno lice ako:

1. vlasnik pušta pse bez kontrole po lovištu, odnosno korisnik lovišta ne uklanja pse i mačke koji se kreću bez kontrole po lovištu (član 22.);
2. vrši ograđivanje lovišta protivno odredbama člana 25.;
3. vrši naseljavanje novih vrsta divljači bez odobrenja Federalnog ministra (član 26.);

4. postupi protivno odredbama člana 27. ;
5. korisnik lovišta vidljivo ne obilježi granice lovišta (čl. 35. i 41.);
6. ne uosnovi katastar lovišta, ili ne dostavi kantonalnom ministarstvu katastar lovišta (član 44.);
7. korisnik lovišta lov vrši prije dobivene saglasnosti (član 48. stav 7.);
8. ne izvrši reviziju lovno-privredne osnove (član 49. stav 3.);
9. na propisanim obrascima i rokovima ne vodi evidenciju o izvršenim radovima i mjerama predviđenim lovno-privrednom osnovom i godišnjim planom (član 50.);
10. koristi ostvarena sredstva za druge svrhe, a ne za gospodarenje i unapređenje lovišta (član 51.);
11. korisnik lovišta ne spriječi sva neetička ponašanja u lovištu (član 52.);
12. dozvoli lov članovima lovačkog udruženja koji nemaju položen lovački ispit (član 55.) i koji nisu članovi lovačkog udruženja;
13. ne osigura odobrenje za odstrjel, odnosno lovnu kartu (član 56.);
14. korisnik lovišta ne vodi evidenciju o izdatim trofejnim listovima (član 64. stav3.);
15. nadležni lovački savez ne vodi banku podataka o vrijednim trofejima (član 67.st.2.);
16. dozvoli iznošenje trofeja izvan teritorije Federacije (član 67. st.4.i 7.);
17. ne izda legitimaciju lovočuvaru i lovočuvar ne vodi službenu knjigu (član 77. st.1.i 2.).

Za prekršaj iz stava 1. ovog člana kazniće se novčanom kaznom od 1.000,00 do 2.000,00 KM i odgovorno lice u pravnom licu.

Član 84.

Novčanom kaznom u iznosu od 1.000,00 do 2.000,00 KM kaznit će se prekršaj pojedinca (fizičko lice) ako:

1. za vrijeme zabrane lova ili lovostaja proganja, lovi ili uznemirava divljač, ili na neki drugi način ugrožava opstanak divljači (član 14. stav 2.);
2. vrši lov ptica i sisara korisnih za poljoprivredu i šumarstvo (član 21. stav1.);
3. bez odobrenja kantonalnog ministra drži divljač u ograđenom prostoru (član 27. stav 2.),
4. vrši trovanje divljači (član 27. stav 1.);
5. vrši odstrjel divljači nelovačkim oružjem (član54. stav 1.);
6. lov vrši nabojima koji nisu lovački, ili poluautomatskom ili automatskom puškom (član 54. stav 3.);
7. vrši lov krupne divljači, osim svinja, prigonom i progonom ili sa psima (član 54. stav 4.);
8. vrši lov bez lovne karte, odnosno odobrenja za odstrjel (član 56. stav 1.);
9. lovi divljač u slučajevima navedenim u članu 57. stav1. al. 1do12, i stav 4. i 5.;
10. u lovu se koristi nečistokrvnim lovačkim psima (član 58. stav 1.);
11. vrši lov divljači mrežama, klopnama i omamljujućim sredstvima bez odobrenja federalnog ministra (član 59. stav 1.);
12. uginulu divljač, ili ulovljenu divljač koristi suprotno članu 62. stav 1.;
13. vrši promet divljači i njenih dijelova protivno odredbama člana 63. stav 1.;

14. iznosi sa područja lovišta ulovljenu divljač i njene dijelove bez propratnice, odnosno trofejnog lista (član 64. stav 2.);
15. na zahtjev lovočuvara ne pokaže lovačke i druge isprave, ili ne dozvoli pregled ulova, sredstava za lov ili sredstava za prijevoz odnosno prijenos stvari (član 76. stav 1. al.1-5.).

Član 85.

Novčanom kaznom u iznosu od 500,00 do 1.000,00 KM kaznit će se za prekršaj pojedinac ako:

1. lovi divljač na zemljištima i vodama izvan lovišta (član 7. stav 1.);
2. lovi divljač nedozvoljenim sredstvima, na nepropisan način i izvan određenog vremena (član 9. stav 2.);
3. vrši lov ženki dok su bremenite, leže na jajima ili se hrane, uništava legla, gnijezda i jaja divljači (član 14. stav 5.);
4. vrši lov medvjeda i drugih zaštićenih divljači unutar zaštićenog uzgojnog područja (član 17.);
5. vrši lov određene vrste divljači za vrijeme privremene zabrane lova (član 18. stav 1.);
6. koristi hemijska sredstva štetna za divljač (član 20. stav 1.);
7. pušta pse da se bez kontrole kreću po lovištu (član 22. stav 1.);
8. pušta ovčarske pse po lovištu izvan stada (član 22. stav 1. i član 23. stav 1.);
9. vlasnici pasa i mačaka puštaju pse i mačke u lovišta bez nadzora na udaljenosti od 300 m od nastambe ili stada (član 23. stav 2.);
10. postupi protivno odredbama člana 28. stav 1. al. 1. do 5.;
11. unosi u lovište oružje koje nije lovačko, ili se kreće izvan javnih puteva, ili vozi po tuđem lovištu sa oružjem koje nije u futrolji ili prtljazniku vozila i ispražnjeno (član 30. stav 1. i 2.);
12. vrši trening i obuku pasa protivno članu 61. ;
13. bespravnom lovom nanese štetu divljači (član 72. stav 1.).

Član 86.

U postupku po privrednom prekršaju pored novčane kazne izreći će se i zaštitna mjera oduzimanja sredstava koja su upotrebljena ili namijenjena za izvršenje prekršaja.

Licu koje počini prekršaj iz člana 84. stav 1. tačka 1 do 8 i člana 85. stav 1. tačka 3 i 4 ovog Zakona, uz izrečenu kaznu, izreći će se i zaštitna mjera oduzimanja sredstava koja su upotrebljena za počinjenje prekršaja i oduzimanje imovinske koristi pribavljene počinjenim prekršajem.

Za slučaj iz stava 2. ovog člana izreći će se mjera oduzimanja dozvole za držanje i nošenje oružja u trajanju od dvije do pet godina.

XII - PRIJELAZNE I ZAVRŠNE ODREDBE

Član 87.

Postupak za naknadu štete pričinjene od divljači započet prije stupanja na snagu ovog Zakona, nastavit će se po odredbama ovog Zakona, ako do dana stupanja na snagu ovog Zakona nije doneseno prvostepeno rješenje o naknadi štete.

Ako je u postupku nadoknade štete doneseno prvostepeno rješenje do dana stupanja na snagu ovog Zakona, postupak po žalbi nastavit će se prema odredbama koje su bile na snazi do tog dana.

Ako je rješenje iz stava 2. ovog člana poništeno prije stupanja na snagu ovog Zakona, postupak nadoknade štete nastavit će se prema odredbama ovog Zakona.

Član 88.

Korisnici koji gospodare lovištima dužni su u roku od godinu dana od dana stupanja na snagu ovog Zakona uskladiti svoje poslovanje, opće i druge akte sa odredbama ovog Zakona.

Član 89.

Danom stupanja na snagu ovog Zakona prestaje primjena Zakona o lovstvu («Službeni list SR BiH», broj: 7/77, 30/90, 4/93 i 13/94).

Do donošenja podzakonskih propisa predviđenih u članu 90. ovog Zakona, na teritorji Federacije primjenjivat će se podzakonski propisi koji su se primjenjivali do stupanja na snagu ovog Zakona, ako nisu u suprotnosti sa odredbama ovog Zakona.

Član 90.

Federalni ministar u roku od godinu dana od dana stupanja na snagu ovog Zakona donijet sljedeće provedbene propise o:

- načinu, sredstvima i alatima kojima se vrši lov iz člana 9.;
- privremenoj zabrani lova iz člana 18. stav 3.;
- vremenu lova divljači zaštićene lovostajem iz člana 24. stav 1.;
- uslovima gospodarenja lovištem iz člana 38. stav 2.;
- načinu obilježavanja granica lovišta iz člana 41. stav 2.;
- sadržaju i načinu vođenja katastra lovišta iz člana 44. stav 4.;
- evidentiranju obavljenih radova iz člana 50. stav 4.;
- načinu upotrebe lovačkog oružja i municije iz člana 54. stav 6.;
- programu, uvjetima i načinu polaganja lovačkog ispita iz člana 55. stav 3.;

- programu sokolarskog ispita i načinu lova divljači pticama grabljivicama (sokolarenje) iz člana 57. stav 8.;
- vrsti i broju pasa za lov pojedinih vrsta divljači u određenim područjima iz člana 58. stav 3.;
- cjenovnik odstrjela i korištenja divljači i drugih usluga u lovištu iz člana 62. stav 6.;
- obrasce potvrde o porijeklu divljači i njenih dijelova i uslovima pod kojim se može vršiti prepariranje divljači i držanje trofeja javno izloženih u objektima, kao i upotrebi mesa divljači u ugostiteljskim objektima iz člana 63. stav 3.;
- obliku obrasca, sadržaju, načinu i postupku izdavanja potvrde i trofejnog lista iz člana 66.;
- o banci podataka vrijednih trofeja i kategoriji vrhunskih trofeja iz člana 67. stav 8.;
- odštetnom cjenovniku iz člana 72. stav 2.;
- o obliku i sadržaju obrasca legitimacije lovočuvara, vrsti uniforme, oznake, uslovima za nošenje oružja, vrsti oružja i veličini lovočuvarskog rejonu iz člana 75. stav 6.;
- o obliku i sadržaju obrasca legitimacije, vođenju o izdatim legitimacijama i sadržaju službene knjige lovočuvara iz člana 77. stav 1.

Član 91.

Ovaj Zakon stupa na snagu osmog dana od dana objavljivanja u «Službenim novinam Federacije BiH».

Presjedavajući
Doma naroda
Parlamenta Federacije BiH
Slavko Matić, s.r.

Presjedavajući
Predstavničkog doma
Parlamenta Federacije BiH
Muhamed Ibrahimović, s.r.